

春秋公羊疏殘本

二

鄭氏
春秋
公羊
疏

春秋公羊疏卷第五

桓公二

起七年

盡十八年

起七年注焚之者何

解云咸丘是邑而反焚之故執

不知問

注樵之者何

解云雖言焚言樵仍非攻邑

之義故執不知問咸丘者何者欲言是國經典未有欲

言非國文無所繫故執不知問

注据邢鄩鄩繫紀者

莊元年冬齊師遷紀邢鄩鄩是注日者重錄以火攻也

者正以侵伐例時卽隱七年秋公伐邾婁之屬是也故

決之

注据滕薛不名也者卽隱十一年春滕侯薛侯

來朝是也

失地之君也者卽曲禮下云諸侯失地名

是

注無後云云

解云知如此者正以郊特牲云諸

侯不臣寓公故古者寓公不繼世彼注云寓寄也寄公之子非賢者世不足尊也是其義又云繼世以立諸侯象賢也注云賢者子孫恒能法其先父德行 注不月

云 解云朝例時春秋常典卽文十五年夏曹伯來朝

是也而此責其月者以文十二年春王正月盛伯來奔傳云盛伯者何失地之君彼書月見其奔重宜厚遇之此不月者朝惡人輕故也僖二十年夏郤子來朝僖公非惡人而不月者正以朝輕于奔故也然則此注因桓惡人故言此若其不然正宜直云失地之君來朝輕矣

注名者云云 解云郤子盛伯皆不名者兄弟故也

八年烝者何 解云欲言宗廟之祭而文無所繫欲

言祭天天無烝名故執不知問 注薦尙非卵又注薦

尙麥魚云云 解云王制云春薦韭夏薦麥秋薦黍冬

薦稻韭以卵麥以魚黍以肫稻以雁 注無牲云云

解云謂無牛羊豕之牲也而中霱禮云祭五祀于廟用

牲有尸皆薦于奧何以薦用牲彼謂正祭之時先薦于

奧仍自無牲其正祭五祀乃用牲有尸耳注天子四祭

四薦云云者皆時王之禮中霱禮亦然 注殷人云云

者卽郊特牲云殷人先求諸陽周人先求諸陰是也

注禮天子諸侯卿大夫牛羊豕云云已下皆時王之禮

也 注天子至索牛者皆指祭宗廟之牲也仍不妨王

制云祭天地之牛角繭栗賓客之牛角尺之文也 注

屬十云云 解云烝者冬祭之名明去年十二月已有烝但得常不書今正月復作烝故言亟 注不異云云 解云烝者冬時祭名前已作訖今宜易名而猶言烝故說之也 注君子生則敬養死則敬享祭義文也彼

鄭注云享猶祭也注故將祭至百官者皆出祭義何氏差約言之也 注散齊七日者卽祭統云故散齊七日

以定之注云定者定其志意也定其志意者謂齊之日不御不樂不弔是也 注致齊三日卽祭統云致齊三

日以齊之是致齊者卽鄭氏云致之言至致謂深也審也之屬是也 注夫婦至奠酒者案今祭義酒作盞字

鄭注云奠盞設盞齊之罇蓋所見異或何休以義引之

不取正文 注君獻尸至事死如事生者皆出祭義唯
孝子之至一句注者之言也注禮本下爲士制者卽士
喪禮士虞士相見之屬是也言此者欲道庶人無禮篇
故傳家偏舉言之卽曲禮上篇禮不下庶人鄭注云爲
其遽於事且不能備物義亦通於此 注天子云云
解云上大夫稱伯仲者卽祭伯南季之屬是也次大夫
不稱伯仲者卽此是也下大夫稱官氏名且字者卽宰
渠伯糾是也 注與上云云 解云周之三月乃是夏
之孟月自有春祠之禮今周之五月乃夏之三月也猶
與上祠同在一時而復爲烝故曰與上祀同爲亟也
注是後云云者卽師卽下十年齊侯衛侯鄭伯來戰于

郎是也其龍門之戰者卽下十三年公會紀侯鄭伯己
己及齊侯宋公衛侯燕人戰云云是也春秋說云龍門
之戰民死傷者滿溝故此柱云汜血尤深也

祭公者何者欲言諸侯而逆王后欲言大夫而經文言
公故執不知問 注天子云云 解云春秋說云立三
台以爲三公北斗九星爲九卿二十七大夫內宿部衛
之列八十一紀以爲元士凡百二十官焉下應十二子
宋氏云十二次上爲星下爲山川也此言天子立百二
十官者非直上紀星數亦下應十二辰故曰下應十二
子也

注三公氏采稱爵者卽祭公周公是也上大夫卽例稱

五十字卽祭伯南季榮叔之屬是也次大夫例稱二十
字卽家父之屬是也下大夫繫官氏名且字卽宰渠伯
糾是也上士名氏通石尙是也次士以官錄卽宰咺是
下士略稱人公會王人于洮是也其劉子單子之屬不
稱字而稱子者謂諸侯入爲天子大夫故設文非王臣
之常稱若然祭公周公官爵適等而僖九年夏公會宰
周公特加宰者彼傳云宰周公者何天子之爲政者也
注云宰猶治也三公之職號尊名以加宰知其職大尊
重當與天子參聽萬機而下爲諸侯所會惡不勝任故
加宰仍非常稱也 注据宰周公稱使者卽僖三十年
天王使宰周公來聘是也而稱宰者義與九年同 注

据待君云云 解云成十七年十一月壬申公孫嬰齊卒于狸軫傳云非此月日也曷爲以此日月卒之待君命然後卒大夫曷爲待君命然後卒大夫前此者嬰齊走之晉公會晉侯將執公嬰齊爲公請公許之反爲大夫歸至於狸軫而卒無君命不敢卒大夫公至曰吾固許之反爲大夫然後卒之者是也 注不言云云 解云外相如者例所不錄言如紀卽外相如故曰辟有外文也 女在其國稱女者卽隱二年紀履緌來逆女上三年公子翬如齊逆女之屬是也 九年京師者何 解云欲言天子之居而文不言王欲言凡國而爲王后所歸故執不知問 京者云云 解云京師之名理須

訓解故分而問之。注地方千里者卽詩云邦圻千里是也。注周城千雉者解在定十二年注卽春云云。解云春秋魯爲王故內魯若周公制禮內京師然也。諸侯來曰朝解云隱十一年師解云爾故此弟子執而難之注据臣云云者僖元年傳文。注在齊云云卽襄九年冬公會晉侯已下齊世子光滕子薛伯小邾婁子伐鄭十一年公會晉侯已下齊世子光莒子邾婁子云云伐鄭是也。注時曹云云者正以十年春卒今又世子代其朝故知其疾也。注傳見云云者卽十年王正月庚申曹伯終生卒夏五月葬曹桓公是也。注故序云云。解云世子代朝明亦合譏世子序諸侯之上

明亦合譏而傳云未知在齊曹者正以其卒葬詳錄故
依違之不信言耳 十年 注小國云云 解云所傳
聞之世未錄小國卒葬所聞之世乃始書之其書之也
卒月葬時文九年秋八月曹公襄卒冬葬曹共公者是
也今卒日葬月者今以敬老重恩故也云云之說當文
皆自有解 會者何 解云經既書會作聚集之名尋
言弗遇是未見之稱故執不知問 郎者何 解云欲
言是邑戰於其內欲言非邑經有城郎之文故執不知
問 注以言來也 解云凡言來者鄉內之辭今經言
來故知近邑也而僖四年楚屈寧來盟于師是時在召
陵而言來者据師道楚故得言來 注据齊云云者在

莊十年 注公敗云云 解云隱元年公敗宋師于菅

莊十年公敗宋師于乘丘莊十一年公敗宋師于鄆凡

有二。經宜隱十年以當之 注龍門云云者卽下十三

年春公會紀侯鄭伯已巳及齊侯宋公衛侯燕人戰云

云依春秋說云是龍門之戰而不言戰于龍門是 近

也云云者近讀如附近之近國讀如圍言兵圍都城相

似故言近乎圍也考諸古本圍皆作國字而舊解以國

爲圍 注据十云云者卽龍門之戰齊師宋師衛師燕

師敗績是也 十有一年 注月者云云 解云正以

微者盟例合時今而書月故須解之 注莊公云云

解云春秋之例君殺無罪大夫皆去其葬卽成十年晉

侯孺卒注云不書葬者殺大夫趙同等是今段有罪故
莊公書葬也然則此言不得與殺大夫同例者謂不得
與殺無罪大夫同例耳 祭仲者何 解云欲言無罪
聽脅立篡欲言有罪褻而稱字故執不知問 注祭仲
死云云 解云下十五年秋九月鄭伯突入于櫟傳云
櫟者何鄭之邑曷爲不言入于鄭末言爾曷爲末言爾
祭仲亡矣然則曷爲不言忽之出奔言忽爲君之微也
祭仲存則存矣祭仲亡則亡矣者是注祭仲探宋莊公
本弑君而立者在桓二年 君可以生易死者謂易去
死也 國可以存易亡者易去亡也 則突可故出者
突可以此之故出之也而忽可故反者言忽可以此之

故而反之也是不可得則病 解云言已終能出突而
反忽則爲權之成若不能如是乃爲其病矣然後有鄭
國 解云言突有賢才已計不行雖然仍須勉力討之
令忽有國雖費功力猶愈於國之亡也 注古人至之
道者出書序長義云若令臣子得行則閉君臣之道啓
篡弑之路解云權之設所以扶危濟溺舍死亡無所設
也若使君父臨溺河井寧不執其髮乎是其義也 權
者何 解云欲言正逐君立庶欲言不正今又言權故
執不知問 注皆所云云者言上辟死辟亡皆爲忽故
也注宋不云云者決成十五年晉侯執曹伯歸于京師
稱爵也卽僖四年傳云稱侯而執者伯討也稱人而執

者非伯討是也 注祭仲不稱行人者云云決定六年
秋晉人執宋行人樂祁犂之屬稱行人也 注執例時
者卽祁犂言秋是也而僖十九年六月己酉邾婁人執
鄆子用之而書日者彼注云日者魯不能防正其女以
至於此明當痛其女禍而自責之然則凡執例時而在
日月下者皆當文有解 注据忽復歸于鄭俱祭仲所
納繫國稱世子不但名也者卽十五年鄭世子忽復歸
于鄭是注欲明祭仲至使與外納同也 解云言與外
納同者卽繫祭仲言于鄭是也言似僖二十五年楚人
圍陳納頓子于頓文十四年晉人納接菑于邾婁之屬
是也 注据小白言入者卽莊九年齊小白入于齊是

也注順其云云解云下十五年傳例云歸者出入無惡故言此注据宋云云解云僖九年三月宋公禦說卒夏公會宰周公齊侯宋子巳下盟于葵丘是也若然案彼經文宋公禦說三月卒夏則公會宋子于葵丘計應未葬故注云宋未葬不稱子某者出會諸侯非居尸柩前故不名也此云宋子既葬稱子者謂以其非居尸柩之前故時既葬之稱而單言子況此鄭忽之父久已葬訖而反名故難之注夷狄云云解云襄二十九年吳子使札來聘哀十三年公會晉侯及吳子于黃池之屬是也注名者云云解云言君薨稱子某既葬稱子者正以既葬稍殺故不得名也然則初薨所

以名者降於既葬也今鄭忽書名者緣君薨而名之義也 注天道本下親親而質省者已下至反之於質皆出於樂說文 注質家爵三等法天之有三光也已下皆春秋說文也 柔者何 解云欲言大夫經不言氏欲言微者而書其名故執不知問 注以俠卒也 解云隱九年春俠卒傳云俠者何吾大夫之未命者也彼注云以無氏而卒之也然則此亦無氏而書見故知未命之大夫也 注輒發云云 解云凡內大夫不書氏有二義若未命大夫亦無氏而此與俠是也貶者亦無氏卽無駭與翬之屬是也故此注云無氏嫌貶也 注所以云云 解云欲道俠之卒當隱公之世故得書